

史

記

疏

證

攷仁和邵位西先生懿辰所著簡明日錄有  
漢書疏證二十四卷云國朝沈欽韓著  
此書既與漢書疏證連續合鈔且行款  
體例亦復相同當亦欽韓作也二書舊  
不題名因于檢書之餘表而出之

正義謚法解

平易不訾曰簡

史詮曰周書訾作疵

愛民長弟曰恭

史詮曰周書愛作安

揚善賦簡曰聖

史詮曰周書揚作稱

執禮御賓曰恭

史詮曰周書御作敬

尊賢讓善曰恭

史詮曰周書賢作德

大慮靜民曰定

史詮曰一本靜民作慈仁

純德不爽曰定

史詮曰周書爽作二

賜民爵位曰文

史詮曰周書賜作錫

小心畏忌曰僖

史詮曰一本僖作釐

諫爭不威曰德

史詮曰周書諫爭作謀慮  
有罰而還曰釐

史詮曰周書罰作伐  
威彊敵德曰武

史詮曰周書敵作敵  
溫柔賢善曰懿

史詮曰周書賢作聖  
夸志多窮曰武

史詮曰周書夸作大  
淵源流通曰康

史詮曰周書康作共

溫柔好樂曰康

史證曰一本柔作良

協時聲厚曰孝

史詮曰周書厚作享

合民安樂曰康

史詮曰周書合作令

資輔就共曰齊

史詮曰周書作共就

敏以敬慎曰頌

史詮曰周書慎作順

昭德有勞曰昭

史詮曰一本昭作明

柔德安衆曰靖

史詮曰周書安作考

聖聞周達曰昭

史詮曰周書聞作文

猛以剛果曰威

史詮曰周書猛作強

不隱無屈曰貞

史詮曰周書屈作私

彊義執正曰威

史詮曰周書執作信

敵圍克服曰莊

史詮曰周書圍作通

勝敵志強曰莊

史詮曰周書作莊志曰勇

屢征殺伐曰莊

史詮曰一本征作行殺作征

戎揚善曰德



史詮曰周書德作懷

秉德尊業曰烈

史詮曰周書尊作遵

死見神能曰靈

史詮曰周書神作鬼

隱拂不成曰隱

史詮曰一本拂作括

極知鬼神曰靈

史詮曰周書神作事

凶年無穀曰荒

史詮曰周書荒作康

蚤孤鋪位曰幽

史詮曰一本鋪作損

使民悲傷曰愍

史詮曰周書悲作折

柔質愛諫曰慧

史詮曰周書愛作受慧作惠

施勤無私曰類

史詮曰周書施勤作勤政

思慮果達曰明

史詮曰一本果作深明作悍

博聞多能曰憲

史詮曰一本憲作獻

思慮不爽曰厚

史詮曰周書厚作愿

好內遠禮曰煬

史詮曰一本遠禮作怠政

克威惠禮曰魏

史詮曰周書惠禮作捷行

慈惠愛親曰隆大慮行節曰孝強毅果敢曰剛

毅迷而不悌曰丁夙夜恭事曰敬象方益平曰  
敬容儀恭美曰勝息政交外曰推逆天虐民曰  
煬

史詮曰今本俱缺

除惡為政

史詮曰周書惡作亂

剛克為發柔克為懿履正為莊有過為僖

史詮曰今本缺為發以下十二字

惠無內德為獻治而無青為平

史詮曰今本缺為獻以下六字

尊修也

史詮曰周書作遵循

又治也康安也服敗也

史詮曰今本缺

秉順也

史詮曰周書秉作康

塞過也

史詮曰今本缺

康虛也

史詮曰周書康作糠

式法也捷克也

史詮曰今本式作武捷作速缺克字

載事也彌久也

史詮曰今本久作文缺二也字

以前周書謚法至以傳後學

史詮曰此二十三字正義本注也與下篇分野所引漢書地理後分注同今本作大書誤也

史記疏證卷第一

三皇本紀

楊慎曰：譙周古史攷以炎帝與神農各為一人，羅泌路史以軒轅與黃帝非是一帝，史皇與蒼頡乃一君一臣，共工氏或以為帝，或以為伯而不王，祝融氏或以為臣，或以為火德之主。錢塘邵泰嚮疑問曰：庖犧近取諸身，遠取諸物，以通神明之德，以類萬物之情，始畫八卦，神農氏耒耨之用，以教萬人，日中為市，交易而退，此聖人之始祖也。夫豈不類人形。

體同獸畜其何以君臨畿甸綏撫萬民乎至  
煉石補天輕清從何登躋鰲足立極餘體向  
何安置蓋共工倣擾天紀網常幾絕女媧滅  
之四土復正萬民更生此所謂補天立極也  
平天成也然雖喻言寶同誕鄙馬貞補入殊  
屬贅瘡况山崩柱折三皇萬歲乘雲車駕六  
羽蓋附會不經矣至履跡感龍蓋惑于履帝  
武敏歆交龍于媪上孕產漢高之謬也男女  
構精萬物化生人交成人獸交成獸安有異  
物交人而生人之理若是則契非嚳子燕父



而人母矣高帝非太公子龍父而人母矣賤人貴畜而曰龍厭常喜新而曰大人跡有母無父豈常經哉古者立郊禘玄鳥至之日太牢祀之天子親往後率嬪御以從乃玄鳥至而祀以生商有天命也故曰天命玄鳥降而生商安得曰吞鳳卵乎姜嫄隨帝之後武以祭于郊禘故履帝武而上帝居歆之敏速也生而棄之者蓋生產每苦其不達而難也今也先生如達矣生產者必折副有災害也今也不折不副而無災害矣居然生子異于常

人之生此所以棄也豈履大人跡之謂哉今以伏羲生于大人之跡神農生于感龍之神是欲以異尊聖而不知其誣聖之甚也將以聖人為非類與

### 太皞庖犧氏風姓

路史後紀曰孔演明道經云燧皇在伏羲前風姓始王天下是伏羲因燧皇之姓矣三墳書言因風而生為風姓鄧氏姓書云東方之帝木能生風故為姓豈其然哉予固謂上世嘗有風國因為姓爾故帝後有風后風國之

后蓋久而後得之

母曰華胥履大人跡於雷澤而生庖犧於成紀  
路史後紀曰詩含神霧云巨跡出雷澤華胥  
履之何圖亦云孝經鉤命訣云華胥履迹怪  
生皇羲注云靈威仰之迹寶積記云帝女遊  
于華胥之淵感地而孕十二年生庖羲長頭  
脩目龜齒龍唇白髯委地

蛇身人首

路史後紀曰玄中記云伏羲龍身靈光賦乃  
云麟身文子云蛇身麟首有聖德故周燮傳

注云麟身牛首非也

於是始制嫁娶以儷皮為禮

路史後紀曰麗鹿皮也古史攷云伏羲制嫁娶以儷皮為禮作琴瑟以為樂通典唐志等皆作儷白虎通義作离云雙皮也婚聘薦皮為可裘服不忘古也禮外傳云伏羲以儷皮為幣

結網罟以教佃漁故曰宓犧氏

路史後紀曰世本伏羲臣芒氏作羅或作句芒

養犧牲以庖厨故曰庖犧

路史後紀曰尋攷古書取犧充庖之說不可  
解于後世崔氏正論更謂太昊設九庖之官  
甚妄

作二十五弦之瑟

路史後紀曰文子世紀伏羲作瑟三十六弦  
盜瑟屬陰故用十六之數世本云庖犧瑟五  
十弦後黃帝使素女鼓之哀不自勝破為二  
十五弦且二均聲故小司馬三皇紀及小史  
皆云伏羲所作之瑟二十五弦

木德王主春令

路史後紀曰寶積記王子年云以木德王故  
曰春皇太昊氏居東方叶于木德故曰木皇  
都於陳

路史後紀曰世紀天皇庖羲都陳留遁甲注  
云伏羲徙治陳倉地非陳國則不必宛丘矣  
然歷代以宛丘為太昊之虛今宛丘北一里  
有伏羲廟八卦壇寰宇記云伏羲于蔡水得  
龜因畫八卦之壇有長史張齊賢文李邑易  
之然九域志陳蔡俱有八卦壇此後人之附

會按姚睦亦云黃帝都陳者則義皇俱在西方矣豈其先後徙耶

立一十一年崩

文獻通考堊宛丘在陳州路史後紀曰世紀云堊南郡在襄陽按帝冢今在山陽高平西北高平襄陽之境然九域志兗單皆有伏羲陵又河中府有庖王廟引戴氏西征記云潼關直北隔河望層阜歸然獨秀謂之風陵伏羲氏風姓也此當是女媧墓然古帝王墓冢皆非一所宜必有說徐孚遠曰上古聖

人無受命短促者伏羲立十一年非是作一百十五年為允 凌稚隆曰按通鑑前編諸史會編皆作一百一十五年疑刊者誤

其後裔當春秋時有任

路史國名紀曰任伯爵本己姓帝魁母家逮黃帝以封幼子周之繼絕也以居風姓今濟陽之任城水經注云亢父即今任城西夏后氏之國也亢父唐隸兗州

宿

國名紀曰宿男爵周武王封宋人遷之隱公元年及宋人盟于宿莊十年宋人杜預云東平亡遷宿不云宿遷于某亡之也



鹽有故宿城七鹽城在今鄆之須城東三十  
六里隨宿城縣也秦置須昌六年改曰宿城於宿  
城西北三十二  
里別置須昌

### 須句

國名紀曰須句子爵成風國邾伐而魯取之  
一作胸地志胸城在壽昌西北今須城西  
北須胸故城者京相璠云須胸一國二城兩  
名非也蓋鄆歸須城而胸猶是故所

### 顓臾

國名紀曰子爵沂之費縣西北二旅有顓臾

故城寰宇記沂水西北八故漢顯史縣

女媧氏亦風姓

風俗通曰女媧伏羲之妹 路史後紀曰盧

全云女媧本是伏羲婦非也

蛇身人首

路史後紀曰玄中記云伏羲龍身女媧蛇軀  
列子以為皆蛇身牛首虎鼻故曾植贊女媧  
云二皇牛首蛇形

惟作笙簧

路史後紀曰禮記明堂位云女媧之笙簧世

本以為隨作宋表注以為女媧氏之臣許氏  
說文曰隨作笙女媧作簧

### 女媧氏沒

水經注曰戴延之西征記潼關直北隔河望  
層阜歸然獨秀謂之風陵此是女媧墓元  
和郡縣志女媧陵在任城縣東南三十九里  
太平寰宇記閩鄉津去閩鄉縣三十里即  
舊風陵關有女媧墓自秦漢以來皆繫祀典  
唐乾元二年虢州刺史王竒光奏所部閩鄉  
界女媧墓天寶失其所在今月一日夜河上

側近忽聞風雷聲曉見墓湧出上有雙柳樹  
下有巨石其柳各高丈餘路史後紀曰墓  
今在潼關口河潭上屹然分河有木數株雖  
瀑漲不漂沒今屬陝之閿鄉縣按元和郡縣  
志風陵堆在河東縣南五十與潼關對寰宇  
記風陵城在其下閿鄉津去縣三里卽陵故  
關也女媧之墓秦漢以下俱係祀典然九域  
志寰宇記濟之任城東南三十九里又有女  
媧陵城冢記云女媧墓有五其一在趙簡子  
城東今在晉之趙城東南五里高二丈九域

志晉州有帝女媧廟寰宇記在趙城故皇朝  
列祀亦在趙城

母曰女登有媧氏之女為少典妃感神龍而生  
炎帝

路史後紀曰春秋元命苞云少典妃安登遊  
于華陽有神童首感之於常羊生神子人面  
龍顏好耕是為神農

長於姜水因以為姓有皇媧補代諸侯國號

路史後紀曰少典氏取於有僑氏是曰安登  
有僑國也世紀云神農母任姁有僑氏女曰

女登非也孰有一姓而任僑兩國者蓋任姒  
乃帝魁之母世多以世魁為神農因合之爾  
火德王故曰炎帝

路史後紀曰世紀云以火承木位在南方主  
夏故謂炎帝闕尹告列之子神農有炎之德  
者通典云有火星之瑞也

始教耕故號神農氏

逸周書曰神農之時天雨粟神農耕而種之  
作陶冶斤斧為耜鉏耨以墾草莽然後五穀  
興 路史後紀曰梁武祠像碑云神農氏因

宜教田闢土種穀以振萬民而管子謂神農  
教耕生谷以致民利陶弘景本草序神農嘗  
草以省殺身之弊

于是作蜡祭

禮記郊特牲曰伊耆氏始為蜡鄭注伊耆氏  
古天子有天下之號皇侃曰神農伊耆一代  
總號其子孫有天下者始為蜡祭其先祖造  
田者熊安生日伊耆氏即神農也或曰大庭  
神農之別號  
以赭鞭鞭草木

搜神記曰神農赭鞭鞭百草盡知其平毒寒  
溫之性臭味所主以播百谷故號神農

始嘗百草始有醫藥

帝王世紀曰神農使歧伯嘗草木典醫療疾  
路史後紀曰太原有神釜岡有神農嘗藥  
鼎又成陽山中有神農鞭藥處一曰神農亦  
名藥草山中有紫陽觀云帝于此辨藥世紀  
曰神農著本草四卷

又作五弦之瑟

桓譚新論曰神農氏繼而王天下于是始削



桐為琴絕絃為絃以通神明之德合天人之  
和 廣雅曰神農氏琴長三尺六寸六分上  
有五弦曰宮商角徵羽又增二弦曰少宮少  
商 路史發揮曰三都賦補史記以為神農  
制琴說文世紀隨志小史則以為神農造琴  
蓋脩之也楊雄琴清英云昔者神農造琴以  
定神禁淫僻去邪欲反其天真新論琴道云  
其琴七弦而鄭遂洽聞記乃以為神農之琴  
二十五絃夫二十五絃在所未聞而七絃則  
世皆以為起於後世或謂周代之所增難亦

嘗發之琴書矣若古聖人凡創一事立一制  
必有不可易之法是故窮思極致無遠近無  
小大必致其三而後已固非若後世之士率  
意而作之者也既討於傳黃帝虞舜琴皆五  
絃而神農唐堯之琴其絃皆七斯其信者然  
則聖人之制果無意乎黃帝虞舜土紀者也  
土之數五故其絃皆五神農唐堯俱以火紀  
火之數七故其絃皆七是皆可得而稽者也  
五絃者琴之本制也蓋以當乎五音大絃為  
君小絃為臣而六七兩弦實為少宮少商故

禮斗威儀云少宮主政少商主事宋襄以為  
聲五而已必加少宮少商者君臣任重為之  
設副者也二少之絃時為文絃武弦一弛一  
張文武之道而世遂以二絃為文武王之所  
加斯大妄矣

遂重八卦為六十四爻

帝王世紀曰庖犧氏作八卦神農重之為六  
十四卦

初都陳後居曲阜

路史後紀曰今宛丘有陳城故陳國傳云太

吳之虛或云神農亦居此酈元云今故城北  
有所謂義神實者其處也傳無炎帝之虛而  
記載皆以為都魯此繆認大庭為神農故爾  
世紀云太昊都陳豫州之域西望方外東及  
明諸胡公之封神農氏亦都之是羲炎果同  
處然攷羲炎之都似在陳倉太昊紀已詳之  
而世紀云又營曲阜故晉志云神農都陳又  
別營曲阜郡國志云自陳徙都於此昔一庭  
阪譙周云炎帝居大庭寰宇記曲阜炎帝之  
虛皆相承之訛也

立一百二十年崩塋長沙

路史後紀曰郡國志云炎帝神農氏葬長沙長沙之尾東至江夏謂之沙羨今郡有萬里沙祠故曰長沙世紀云神農塋茶陵獬圖經云茶陵者所謂山谷生茶名也炎陵今在麻陂林子茂密數里不可入石麟石土兩於蒼然逾四十圍兩杉而上陵也前正對紫金嶺丁未春予至焉寓人云年常有氣出之五行書云神農丁亥日死丁未日塋 文獻通考淳熙十四年衡州守臣劉清之奏史載炎帝陵在

長沙茶陵今衡州茶陵縣是也陵廟皆在康  
樂鄉白鹿原距縣百里而祠宇廢名勝志  
史記炎帝葬于茶山之野茶山即景陽山也  
以陵谷間多生茶茗故名在茶陵州治東高  
一千五百丈周迴百四十里茶水發源山北  
流瀧下十里合白鹿泉水以入於沘水經沘  
水出茶陵縣上鄉西北過其縣西地理志謂  
之泥水也白鹿原去州南一百里炎帝墓在  
焉

神農本起烈山故左氏稱烈山氏之子曰柱亦

曰厲山氏禮曰厲山氏之有天下是也

路史國名紀曰郡國志云厲山神農所生荆  
州圖經云永陽縣西北有厲山神農所生處  
後紀曰按列厲與烈音本通垂帶如厲裂也  
故音為裂趙都賦與越叶蜀賦亦與結叶詩  
栗烈叶卒歲而校獵賦隆烈亦與內叶知古  
同也且厲山即賴山故登真隱決音薤字為  
咸厲切蓋音如賴注者不知謂音小異誤矣  
開山圖云厲山氏產山谷分布元氣蓋即厲  
山氏蔡墨曰厲山氏炎帝也起於厲山者禮

七祀太厲傷神也儀禮正義謂帝王之無後者至漢七祀無厲而有山神說者遂以為厲山氏妄矣杜預又以烈山謂炎帝時諸侯劉玄已非之

神農納奔水氏之女曰聽訖為妃

路史國名紀曰神農取承桑氏陝之靈寶有桑里亭後紀曰漢書作桑水氏書傳多作奔水氏字轉失也吳起云承桑之君脩德忌武以喪其國神宗皇帝神武秘畧言有唐滅之唐太宗金鏡述惟作桑氏即承桑也太



平御覽詁音妖生常林

生帝哀哀生帝克克生帝榆罔

路史後紀曰書傳堯後為哀哀後為榆罔失  
之按堯來互音故書傳多作帝來小司馬記  
厘生哀哀生克克生榆罔又以哀克為二矣  
又曰炎帝參廬是曰榆罔居空桑

凡八代五百三十年

路史後紀曰春秋命曆叙炎帝八世五百二  
十年古今通系年代曆世紀補史記外紀紹  
運紀運圖等並因乎此 又曰古今通系系

炎世在位之歷帝承六十年臨八十年明四十九年直四十五年來四十八年哀四十二年榆罔五十年小司馬史記乃有魁無臨而通鑑外紀神農後為臨魁六十年帝承繼之帝承六年諸書不同世紀等不逾此夫神農七十世以炎黃之在位觀之不下數百千年而命曆叙等類以為八世五百二十年此所以致傳記之紛紛且以炎黃為世皆踰百載其子孫無一及於百年又皆上下於四五十間知其難據

其後有州

路史國名紀曰州桓公五年州公如曹說者  
為即淳于與地廣記高密夷安城淳于本春  
秋州國也今海之東海縣有大小州山本家  
併王之三公稱公云襄內侯者非也劉敞侯  
如祭公者蓋或云懷之武德非武德漢故河  
胡公之類晉有州緡水經漢有州成侯  
近地有州氏金石錄有州輔皆吉成侯

甫

路史國名紀曰今拱之考城東北有薄城漢  
縣屬山陽本宗地莊十一年盟薄者預云  
梁國蒙縣北薄城即此

甘

路史國名紀曰京兆鄠西南五里有甘亭鄠  
志或云甘盤之國啓扈戰於此馬融云甘鄠  
在鄠北當在戶東甘

許

路史國名紀曰許男爵太叔之封鄭滅之王  
符云潁川許縣

戲

路史國名紀曰戲驪山之北水名今新豐有  
戲亭鄠縣志昭應東北三十里有古戲亭幽

王死焉韓云卞入縣南四十里或云出褒戲此而  
名妄也兩京等道正音希

露

路史國名紀曰露參盧之封茶陵露水鄉有  
露水山予訪炎陵稽其始封字亦作潞蓋商  
周間衍于河東北爾

齊

路史國名紀曰齊侯爵伯陵氏之故國以天  
齊淵名呂尚復封都營丘今青之臨菑也然  
營丘故城乃在濰之昌樂故萊侯與太公爭

營丘後胡公徙薄姑地志謂尚封薄姑非

紀

路史國名紀曰紀侯爵姜姓與地廣記紀侯

故城在壽光

寔宇

昌樂

西六

十有

劇城

內有

紀

濰

紀

臺高九尺

紀侯所

築蓋後遷於此

怡

路史國名紀曰怡一曰默怡今營之柳城亦

作台即墨台禹師墨如或云墨台

向

路史國名紀曰向姜國今河陽西北三十五

申

有向城鄴元云軹南四十五向城灑源故地名在  
河上寰宇紀在懷之璠預皆以河內軹西有  
向而無城疑為蘓田按紀年鄭侯使韓辰歸  
晉陽向二月城陽向名陽為河故十三州  
志云軹縣南山西曲有故向城即周之向國  
然代以為承之向乃莒邑向城在承縣宣四  
今密之莒縣南七十二故向城乃莒邑非  
姜國蓋以傳姜不安莒而以為近莒爾

路史國名紀曰申伯爵初為候平王母申姜  
國楚靈遷之今信陽軍之方城內也唐申州

之南陽漢之宛縣詩云王命召伯定申伯之  
宅徹申伯土田潛夫謂在南陽宛北序山之  
下所謂于邑于序者

### 呂

路史國名紀曰呂侯爵伯夷之封杜預謂在  
南陽宛西南陽今隸鄧宛後周併而太公乃  
出東呂呂莒也博物志曲海城有東呂鄉東  
密之莒縣東百霍邑亦曰呂武德初為呂州  
六十漢曲海城霍邑亦曰呂武德初為呂州  
年廢圖經以新蔡為古呂國蓋後來之呂近  
申在周亦曰甫一作郚郚上蔡有



一說三皇謂天皇地皇人皇為三皇

路史前紀曰諸書說三皇不同洞神既有別  
三皇君中三皇君而以伏羲女媧神農為後  
三皇周官大戴禮六韜三畧文列莊子不韋  
春秋有三皇之說而劉恕以為孔門未有明  
文孔安國曰伏羲神農黃帝之書謂之三墳  
世遂以伏羲神農黃帝為之三皇斯得正矣  
至鄭康成注書中候勅省圖乃休春秋運斗  
樞紐黃帝而益以女媧與洞神之說合然白  
虎通義乃無女媧而有祝融甄曜度與梁武

帝祠象碑則又易以遂人蓋出宋均援神契  
注與譙周之史致紛紜不一故王符云聞古  
有天皇地皇人皇以或及此亦不敢明至唐  
天寶七載始詔以時致祭天皇氏地皇氏人  
皇氏于京城內而王璵建言唐家仙系所宜  
崇表福區請度昭福作天華上宮及靈臺大  
地婆父祠於是立三皇道君太古天皇中古  
伏羲女媧等堂皇則太古天皇外復別立三  
皇矣

天地初立有天皇氏十二頭

路史前紀曰項竣始學篇天皇十三頭韋氏  
洞紀云一姓十三人也它書皆然獨春秋緯  
言天皇地皇人皇皆九人分為九州長天下  
故河圖括地象云天皇九翌提名旋復蓋輔  
翌者九人爾

立各一萬八千歲

路史前紀曰三皇經天皇地皇人皇開治各  
二萬八千歲而河圖帝系譜等天地二皇俱  
萬八千歲始學篇則云八千歲按真源云盤  
古氏後有天皇君一十三人時遭劫火乃有

地皇君一十一人各萬八千餘年乃有人皇  
君兄弟九人結繩刻木四萬五千六百年皆  
難取信夫太素莫董固有定數然方此時歲  
曆未著烏從而紀之哉三墳書以一歲為一  
易草木蓋以草木周禪為之紀輯爾

地皇十一頭火德王

路史前紀曰帝系譜云天皇氏以木德王地  
皇氏以火紀始學篇亦謂天皇以木德王

興于熊耳龍門等山

路史前紀曰見遁甲開山圖

人皇九頭

路史前紀曰張晏云人皇九首韓敕孔廟碑云前開九頭以叶言教是也寶積記云斯頻國石室中有三皇石像皆龍形長六丈天皇十二頭地皇十一頭人皇九頭頭者人也若今數牛魚然古質故爾

乘雲車駕六羽

路史前紀曰見雒書寰宇記作抵車誤

出谷口

路史前紀曰遁甲開山圖云人皇出于刑馬

山提地之國山今在秦州伯陽谷水出之老子之所至又曰谷口古塞門或云上陽谷蜀秦交傳云三皇乘祗車出谷口謂今之斜谷樂史從之妄矣

兄弟九人分長九州各立城邑

路史前紀曰雒書云人皇出于提地之國兄弟別長九州已居中州以制八輔則九州肇此分矣今石埭有九皇里非一所也

凡一百五十世合四萬五千六百年

路史前紀曰三五曆云人皇百五十六代合

四萬五千六百年小司馬氏取之不足稽也  
自人皇已後有五龍氏

路史前紀曰張陵二十四治圖云伏羲造天  
地五龍布山岳也真源云五姓乘雲車而治  
天下時人火處巢居日月貞明一曰五龍紀  
餘論曰春秋命曆序云皇伯皇仲皇叔皇  
季皇少五姓同期俱駕龍馱曰五龍遁甲開  
山圖云五龍見教天皇榮氏云五龍爰皇後  
君也昆弟五人人而而龍身然以五音五行  
分配為五龍之名如角龍木仙商龍金仙之

類而以宮龍土仙為父又言五龍以降天皇  
兄弟十二人分五方為十二部法五龍之迹行  
無為之化為十二時神是天皇在五龍後安  
矣鄜元水經云父與諸子俱仙治在五方亦  
見李善游仙詩注今上郡奢延膚施縣有五  
龍山蓋其出治之所也故漢宣帝立五龍仙  
人祠于膚施亦著地理志按膚施今隸延安  
五龍山在焉有帝原水黃帝祠九域志云五  
龍池有黃帝五龍祠四在山上亦曰仙泉祠  
寰宇記五龍泉出山東一里平石縫雄吼甘



美上有五龍堂而五龍谷水乃在耀之雲陽  
縣雲陽宮之西南又非上黨之五龍山也

### 燧人氏

曲禮疏曰案譙周古史攷云有聖人以火德  
王造作鑽燧出火教民熟食人民大悅號曰  
燧人 路史前紀曰禮含文嘉云燧人氏鑽木  
取火炮生為熟令人無有腹疾遂天之意故  
曰燧人典略云燧人鑽木取火免腥臊變熟  
食人事也白虎通義云取火教民熟食制養  
禮性避臭去毒謂之燧人

大庭氏

路史前紀曰大庭氏都于曲阜故魯有大庭氏之庫昔者苗帝禘于大庭之綰茲其所矣治九十載以火為紀號曰炎帝

栢皇氏

路史前紀曰春秋命曆敘云皇伯登出搏桑日之陽駕六龍而上下乃栢皇也

中央氏

路史前紀曰中皇氏封禪之帝也當是時人結繩而用之居皇人山之西是為菽鄩山一

曰中央氏

卷須氏 栗陸氏

路史前紀曰栗陸氏是為栗陸教昏勤民懷  
諫自用於是乎民始携東里子者賢臣也諫  
不行而醜之栗陸氏殺之天下叛之栗陸氏  
以亡。子鄧拆

驪連氏

路史前紀曰昆連氏一曰釐連氏一曰釐蓄

氏釐本又

赫胥氏

路史前紀曰赫蘇氏是為赫胥光曜赫奕而隆  
名有不居即以胥而自况九洛泰定爰脫灑  
於潛山葬朝陽

### 尊盧氏

路史前紀曰尊盧氏是為宗盧治九千餘載  
位嶽臺之陽塋浮肺山之陰即今藍田山其  
西尊盧氏冢存

### 渾沌氏

路史前紀曰六韜之書渾沌氏在昊英氏前  
及班固表古今始列之伏羲之下應劭作書

遂以為太昊之良佐三墳姓纂一皆因之失其本矣昔者孔子謂子貢曰渾沌氏之治若予與汝奚足以知之渾沌氏豈太昊之佐哉

昊吳氏

路史前紀曰昊英氏或曰子英昔者昊英之世以伐木與殺獸人民少而木獸衆人帝之世不壽不卯官無共備之勞而死不得用享事不同而階王以時異也伐木者衣新之世

也現商子

有巢氏

韓子曰上古之世人民少而禽獸衆人不勝禽獸虫蛇聖人有作構木為巢以之羣居天下號曰有巢氏 路史前紀曰遁甲開山記云石樓山在琅琊昔有巢氏治此山南注城陽縣東北有婁鄉是 又曰禮運所言有巢氏在遂人氏之前六韜所叙乃吳英氏之後有巢也而汲書所說有巢氏為在夏商間故外紀云非人皇後有巢氏也

朱襄氏

路史前紀曰有巢氏沒數閱世而朱襄氏立

於是多風羣陰閔昌諸陽不成百物散解而  
果斃草木不遂遲春而黃落盛夏而疢痍乃  
令壬達作五絃之瑟以來陰氣以定羣生令  
曰來陰上達似是不達之訛然樂錄都于朱  
故號曰朱襄氏朱或作株劉昭云陳留株邑  
宋之下邑縣古史攷亦云陳之秋邑朱襄氏  
之邑野寰宇記拓城為朱襄氏  
之邑拓故城在下邑南七十

葛天氏

呂氏春秋曰昔葛天氏之樂三人操牛尾捉  
足以歌八闋路史前紀曰葛天者權天也

爰儼旋穹作權象故以葛天為號

### 陰康氏

路史前紀曰陰康氏之時水瀆不疏江不行其原陰凝而易閔人既鬱於內腠理滯著而多重脰得所以利其關節者乃制為之舞教人引舞以利道之是謂大舞見呂氏春秋孟陰康之王次于偕天有治于華原堃浮肺山襄陵之變而始制舞之陰

### 無懷氏

大戴禮曰無懷氏之民至老死不相往來



故春秋緯稱自開闢至于獲麟凡三百二十七萬六千歲分為十紀凡世七萬六百年

路史餘論曰按春秋命曆叙自開闢至獲麟二百二十七萬六千歲分為十紀漢嘉平中沛相計掾陳晃上言曆元不正謂自開闢至獲麟凡二百七十五萬九千八百八十六歲故易乾鑿度春秋元命苞云二百七十六萬歲每紀為一十七萬六千年廣雅因之均為荒誕按禮含文嘉推以上元為始起十一月甲子朔旦夜半冬至日月五星俱起牽牛之

初是為曆本故鄭玄云上元者太素以來所  
求之年也唐李淳風推自麟德元年甲子上  
距上元甲子積終二十六萬九千八百八十  
載而僧一行以太衍數推上元甲子積距開  
元甲子亦止得九千六百九十六萬一千七  
百有四十是其日數也 文獻通考曰按古  
書之流傳於今者惟六經六經之前則三墳  
五典八索九丘是也紀中言春秋緯稱自開  
闢至獲麟凡三百二十七萬一千歲分為十  
紀凡世七萬六百年則上古之書蓋不可勝

計然其說荒誕故亡取焉

一曰九頭紀二曰五龍紀三曰攝提紀四曰合  
維紀五曰連通紀六曰序命紀七日脩飛紀八  
曰回提紀九曰禪通紀十曰流訖紀

路史前紀曰諸記不一按雜書云三皇號九  
頭紀次五帝號五龍紀次攝提紀次連通紀  
次叙命紀次因提紀次禪通紀次為合維循  
蜚傳之謬爾又曰十紀者舊言大在遂人  
前鄭康成六藝論云遂人後歷六紀九十一  
代至伏羲始作十二言之教方叔機注云九

頭一五龍五攝提七十二合洛三連逋六叙  
命四凡九十有一如鄭所言則十紀皆在遂  
人之後而四紀又在伏羲之後非也馬總之  
徒俱謂十紀通百八十有七代又云伏羲前  
六後三各立年歲亦惟取據張揖慎到徐整  
等爾皆不可質

史記疏證卷第二

五帝本紀第一

歐陽脩帝王世次圖後序曰據書及諸說云堯壽一百一十六歲舜壽一百一十二歲禹壽百歲堯年十六即位年七十年年八十六始得舜而試之二年乃使攝政時舜年三十居試攝通三十年而堯崩舜服堯喪三年畢乃即位年五十年而崩方舜在位三十年命禹攝政凡十七年而舜崩禹服舜喪三年畢乃即位年十年而崩由是言之當

堯得舜之時堯年八十六舜年三十以此推  
而上之是堯年五十七已見四世之玄孫生  
一歲矣舜居試攝及在位通八十二年而禹  
壽百歲以禹百年之間推而上之禹即位及  
居舜喪通十三年又在舜朝八十二年通九  
十五年則當舜攝試之初年禹纔六歲是舜  
為玄孫年三十時見四世之高祖方生六歲  
矣至於舜取堯二女據圖為曾祖姑雖古遠  
世異與今容有不同然人倫之理乃萬世之  
常道必不錯亂顛倒之如此然則諸家世次

壽數長短之說聖經之所不著者皆不足信也決矣。胡宏皇王大紀仲尼繫易歷叙制器致用兼濟生民者獨稱犧農黃帝堯舜氏蓋以是為五帝也而顯章無聞焉太史公所薦特形容之虛語爾。朱子曰五帝紀所取多古文尚書及大戴禮為主為知所考信者然伏羲神農見易大傳乃孔聖之言而八卦列于六經為萬世文字之祖不知史遷何故乃獨遺而不錄遂使史記一書如人有身而無首此尚言知所考信者耶。習學記言曰

犧黃為文字之始聖智之先不獨學者言之  
孔子益言之矣至於簡棄鴻荒斷自克舜則  
何必孔子自舜禹以來固然也何以知之方  
禹益皋陶共明治道祖述舊聞其時去黃帝  
顛頊不遠所稱道德廣大皆獨曰堯舜未有  
上及其先者惟羣聖賢之心豈夸禰而忘祖  
哉故余以為神靈不常非人道之始闕弗敢  
論非掩之也如遷所見五帝德帝繫姓雖曰  
起自黃帝若夫稽古而得之君止堯舜臣止  
禹準陶而羲黃后牧之倫不預焉遷未造古



人之深旨特於百家雜亂之中取其雅馴者而著之然則典謨大訓徒雅而已乎况黃帝堯舜之後既數千年長老所言不可信審矣不擇義而務廣意亦為學之患也 辨惑曰五帝之名史記以黃帝為首書序以少昊為首其說不同要之少昊黃帝之子顓頊黃帝之孫帝嚳黃帝之曾孫而堯帝嚳之子也初皆傳之子孫至于堯舜其子不肖不足以付大器乃始有禪讓之事斯蓋不得已之變而或者遂云五帝官天下三王家天下何其妄

也 路史發揮曰司馬氏父子世典太史其  
作史記也首于黃帝而繼之以顓帝帝嚳又  
繼之以唐虞以為紀三皇耶則不及義炎以  
為紀五帝耶則不應黜少昊而首黃帝學者  
求之而不得其說此所以致後世之紛紛而  
蘇子之所以紀三皇也竊觀太史公記首黃  
帝者特因於世本若大戴禮帝繫五帝德蓋  
紀其世而非主於三與五之說也抑以為後  
世氏姓無不出黃帝者故首而字之至于義  
炎鮮有聞焉是以不紀是太史公之本意也

又曰孔安國劉向服虔以黃帝為三皇而  
司馬遷列之五帝首晁錯桓譚王肅遂以為  
據夫以黃帝首五帝則五帝為六而三皇少  
其一故甄曜度益以祝融氏白虎通益以共  
工氏鄭康成益以女媧為皇而五帝為六人  
以謂德合五帝者稱之不必人數拘而梁武  
遂以燧人為皇黃帝少昊顓頊帝嚳堯為五  
帝舜弗豫謂舜非三王亦非五帝特與三王  
為四代尤為無據黃氏日抄曰遷之紀五  
帝自謂擇言之尤雅者若干篇其存古之意

厚矣然黃帝殺蚩尤與以雲紀官纔一二事  
若行禪事已不經至顓頊帝嚳紀皆稱頌語  
非有行事可考唐虞事雖頗詳皆不過二典  
所已載然則孔子定書斷自唐虞至矣何求  
加為 柯維騏曰五帝之名見于孔子家語  
及大戴禮其說有二其一孔子答季康子以  
伏犧配木神農配火黃帝配土少昊配金顓  
頊配水此言數聖人革命改號取法於五行  
之帝非五帝之定名也其一則孔子所答宰  
予五帝德曰黃帝曰顓頊曰帝嚳曰堯曰舜

太史公所述五帝紀是也厥後皇甫謐作帝王代紀蘇子由作古史鄭樵作通志並祖孔安國以伏羲神農黃帝為三皇少昊顓頊帝嚳堯舜為五帝五峰雙湖胡氏又主秦博士天皇地皇人皇之議而以伏羲神農黃帝堯舜為五帝道原劉氏遂以為定論竊謂皆不如太史公之說為有徵耳 仁和吳廷華曰周禮外史掌三皇五帝之書疑即左氏所謂三墳五典然三皇之書不博史遷斷自黃帝是也具言曰學者多稱五帝尚矣然尚書獨

載堯以來而百家言黃帝其文不雅馴薦紳  
先生難言之據其說似亦以唐堯已前荒渺  
莫據而百家必推極于開闢之初自天皇帝  
皇人皇五龍有巢燧人外又有庖犧十五世  
九頭十紀之名且謂開闢至獲麟九三百二  
十七萬六千載如皇甫謐帝王代紀徐整三  
五歷譙周古史攷及春秋緯諸書皆子長所  
謂其文不雅馴者即以三皇五帝論譙周以  
伏羲燧人神農為三皇宋均以犧農祝融為  
三皇鄭元依春秋緯以犧農女媧為三皇外

紀謂自伏羲至舜凡三十一人總為五帝紀  
家語孔子答季康子問則以太昊炎帝黃帝  
少昊顓頊為五帝胡五峰則云自燧人而上  
即三皇之世有庖犧神農黃帝堯舜而言即  
五帝之世蓋據易繫傳言之故朱子亦以庖  
犧神農黃帝堯舜為繼天而立極胡雙峰又  
謂黃帝以來皆言帝而不言皇仍以天皇地  
皇人皇為三皇惟孔安國尚書序皇甫謐世  
紀孫氏註世本並以伏羲神農黃帝為三皇  
少昊顓頊帝嚳堯舜為五帝唐貞觀中祀歷

代帝王因之然又別祀天皇地皇人皇則攷  
古未確也

黃帝者

正義曰按黃  
帝姓曰附寶

路史後紀曰母吳樞曰符葆即附寶河圖云  
黃軒母曰地祇之子附寶也宋書志作符寶  
名曰軒轅

路史後紀曰名茶河圖挺輔佐云黃帝告天  
老曰茶者蓼而龍以白圖授予茶古舒字或  
作余故世本云伯余作衣裳淮南子伯余之  
初作衣許註亦云黃帝王冰黃帝經序及難



經疏乃云黃帝名全字轉訛 又曰河圖握  
拒云黃帝名軒北斗黃神之精孝經鉤命決  
云附寶出降大靈生帝軒故文選言登封降  
禪齊德黃軒牽秀云邈矣帝軒世紀云或曰  
帝軒尚書中候云黃帝提象又云黃帝巡洛  
龜書赤文成字象軒而論語撰考亦有軒知  
地利九牧倡教之語是黃帝名惟名軒不曰  
軒轅軒之字曰玄律見黃帝經序及難經疏  
按軒星謂之玄軒廣韻九合內志文云竹受  
氣于玄軒之宿是矣然則名軒而字玄律理

或然也。山海經：帝律生帝鴻，則帝之字律尤信。

而蚩尤最為暴，莫能伐。蚩尤，孔子三朝記曰：愚按周禮肆師疏亦引三朝記云：庶人之强者。

教熊羆貔貅

虎

正義曰：按言教士卒習戰以

之名，名之用，威敵也。

以

徐孚遠曰：諸葛武侯置陣有龍虎蛇鳥之號，八陣起于軒轅，正義所說理或然也。

三戰然後得其志。

邵泰衢曰：史載黃帝在位百載，崩年百有一。

十是十有一齡即登帝祚矣弱齡童稚雖習  
干戈安能敵強諸侯而使之賓從又安能敵  
最暴之蚩尤而禽誅之尤可異者黃帝阪泉  
之戰也是奪神農氏之天下而有之三戰後  
得志炎帝雖欲侵陵諸侯未必有桀紂之矯  
誣上天沉酒冒色也則此得志也者其亦異  
于南巢牧野之師矣况黃帝易所稱垂衣裳  
而天下治者也夫豈以軍旅自衛而以武得  
志者哉涿鹿阪泉固難稽測習用干戈三戰  
得志殆事屬無徵者乎

西至于空桐

秀水朱彞尊曰按岷州原州肅州汝州蘭州  
贛州皆有空同山史黃帝本紀西至空桐登  
鷄頭世以為隴石之山無致疑者左傳哀公  
二十六年宋景公游于空澤卒于連中火尹  
興空澤之士于甲春公自空桐入則汝州之  
山也山下有廣成城廣成澤上有廣成觀宋  
宣和中汝守林時請于朝建立說者謂襄城  
且茨壤地相接疑軒皇問道當於此地然稽  
之爾雅北戴斗極為空桐空桐之人武司馬

彪注莊子亦云空桐當斗之山則空桐宜在  
北矣且問道之文載于莊子其初往見廣成  
子謂帝不足以語至道退而築特室席白茅  
間居三月復往要之廣成子南首而卧帝順  
下風膝行而進當日帝邑于涿鹿之阿去薊  
甚邇故不難復要之又寰宇記薊縣有笄頭  
山空桐笄頭相去不遠而陳子昂薊丘覽古  
詩云尚想廣成子遺跡白雲隈然則薊之空  
桐未可定其非黃帝問道之所  
而邑于涿鹿之阿

路史後紀曰史傳言帝居涿鹿世本云涿鹿在彭城代弗知也故魏土地記云濟南城東六十里有涿鹿城城東一里有阪泉泉上有黃帝祠則世本之言信矣然鳩州懷戎乃故涿縣有涿鹿山黃帝祠阪泉蚩尤城世止以爲帝邦在是而世紀遂疑上谷常名彭澤非也按涿鹿有三又有督濁二音上谷本蚩尤之居而彭城乃黃帝之都蓋帝克尤以其名來此猶春陵之內啟爾若脩武之濁鹿與蚩尤二冢相近則尤死之地又嘗以此名冠之

也

舉風后力牧嘗先大鴻以治民

淮南子曰黃帝治天下而力牧泰山稽輔之  
或云併風后常先大鴻為六相

旁羅日月星辰水波上石金玉正義曰旁羅猶

陽時節也星二十八宿也辰日月所會也水  
波瀾滿也言天不異災土無別害水少波浪

山出珍寶

愚按旁羅依徧布之解為是俗學穿鑿輒以  
為測天度之器然則水波土石金玉亦可以  
測天度之器也乎

黃帝居軒轅之丘

集解  
射之  
南海  
經曰  
在窮  
山之  
際

服  
軒轅  
謂

愚按山海經西山經曰軒轅之丘無草木洵

水出焉南流注于黑水郭璞注黃帝居此丘

娶西陵氏女因號軒轅丘若引以注此甚當

又海外西經曰軒轅之國在北窮山之際在

女子國北窮山在其北不敢西射畏軒轅之

丘郭璞注言敬畏黃帝威靈故不敢向西而

射也軒轅國與軒轅丘相距遠甚集解所引

舛錯殊甚

徐孚遠曰正義以兵車為營衛



則軒轅之號張說非也

而娶於西陵之女

路史國名紀曰春秋有西陵羔見世本

其一曰玄囂是為青陽

路史發揮曰玄囂青陽少昊三人也說者以玄囂為青陽或以青陽為少昊或盡三者以為一副為淺陋按春秋緯黃帝傳十世雖未足信然竹書紀年黃帝至禹為世三十世以今攷紀亦一十二世昔漢杯育治始終黃帝而來迄元鳳之三三千六百二十九載帝世

季世正自多有內簡黃帝後有帝鴻有帝魁  
有青陽有金天而後乃有高陽金天少昊俱  
為青陽之子攷之書則無疑質之世則不詭  
青陽玄囂自二人固也司馬公作史記不紀  
少昊畧不識其所出而言玄囂不得居帝位  
夫少昊之桀度顯在人自三代以來皆所尊  
用祀于五帝之位正於月令之次德之在人  
如是之著而玄囂不得居帝位則玄囂非少  
昊明矣外傳史記古書皆不言史記云黃帝  
昊為黃帝之子也生玄囂是為青陽降居江水此太史公之誤

也黃帝之子二十五宗賜姓十二惟紀有二  
餘十有三皆姬姓也青陽與夷彭同為紀姓  
玄囂與蒼林同為姬姓少昊生於青陽循其  
紀姓帝嚳出於玄囂循其姬姓世本紀姓出  
於少昊而帝嚳之子帝堯猶襲姬姓氏姓之  
來各有派別則玄囂青陽又不得為一明矣  
玄囂西陵氏之子青陽方雷  
氏之子少昊于類氏之子夫玄囂降居江  
水青陽安得降居江水之事益太史公統記  
二人皆出黃帝而並別之後世因傳習而誤  
之其初宜曰生玄囂青陽玄囂降居江水爾

馮子玄魏曹子建之贊少昊也亦稱祖自軒  
轅青陽之裔則少昊為黃帝之孫而青陽之  
後矣惟帝德攷云黃帝之子少昊曰清又曰  
清者青陽也其子曰摯茲太史公之所取所  
以致學子之疑者蓋少昊二字傳之者之贅  
之也少昊非清而摯即少昊鄭子是以張衡  
條遷固之違誤謂帝繫說黃帝產青陽昌意與  
周書之說異而郭璞亦云少昊金天氏帝摯  
之子也然以摯為青陽之名則又誤矣記注  
紊亂如此學士何從而要質之乎故詳焉

吳廷華曰據左氏傳載郟子說云我高祖少昊  
擊之立則少昊名擊不名元翼青陽或云少

昊邑于窮桑國於青陽因以為氏池州有或

云窮桑即曲阜或云後徙曲阜然左氏以魯

為少昊之虛曲阜既非青陽亦無自曲阜徙

青陽又自青陽徙曲阜之理其說不足據也

郟子又云自顓頊以來不能紀遠則少昊在

黃帝之後顓頊之前可知今正妃二子中既

無少昊豈當繼立之時又別于二十三子中

求之如皇甫方雷氏所生之說耶此紀畧去

少昊若以易傳為斷則不應又叙顓頊帝嚳  
若以宋衷所云五運為斷則無論五運為識  
緯家傳會于黃帝之說不足信即以五運言  
之黃帝土少昊金顓頊水帝嚳木帝堯火正  
令五運之次何以不叙且即以為非五運之  
次而不叙矣然少昊之君天下固不容沒也  
如舜紀載四凶所自出由帝鴻賈逵曰而及  
少昊由少昊而及顓頊其次并不可謂黃  
帝後無少昊也且如帝嚳之後不叙摯而叙  
堯然帝嚳紀則云帝嚳崩而摯代立帝摯立

不善崩而弟放勳立此雖不叙而未嘗竟削其籍乃黃帝紀則竟以為顓頊繼立若無少昊其人者何也况既云一曰元囂二曰昌意又云顓頊為昌意之子帝嚳為元囂之子則繼黃帝而立者非元囂即昌意矣乃俱不繼立豈俱先卒耶即曰先卒亦應以元囂之子帝嚳繼乃舍嚳而立頊者豈斯時嚳德尚不足以及君天下耶然據嚳紀稱其生而神靈自言其名則其君德素具何不繼黃帝而繼顓頊此誠有所不可解者

青陽降居江水

大戴禮帝繫篇云降居泝水

昌意娶蜀山氏女曰昌僕

大戴禮帝繫篇云昌濮

黃帝崩

路史後紀曰五行書帝以甲戌日崩一云戊午

葬橋山

元和郡縣志子午山亦曰橋山直真寧縣東  
八十里黃帝陵在山上 路史後紀曰按混



天記黃帝葬南陵山南陵故莽曰上陵山而  
神鑑謂黃帝塋南甲山則首向也思玄注云  
黃帝塋西海橋山地志亦謂山有黃帝塚史  
記武帝巡朔方還祭黃帝冢于橋山元魏諸  
帝亦數祭焉後魏書文成東巡涿鹿祠黃帝  
祭橋山觀溫泉幸廣審泉今在上谷東南二  
十里九域志橋山又有軒轅太子陵廟而媯  
之懷我川橋山有黃塋及祠焉 讀史折衷  
曰軒轅陵在橋山載紀所同特橋山匪一上  
郡媯州皆有之漢武帝元封元年帝北巡朔

方勒兵十餘萬還祭黃帝冢橋山此上郡之  
橋山也北魏明元帝神瑞二年六月丁卯南  
次石亭幸上谷壬申幸涿鹿登橋山觀溫泉  
泉使使者以太牢祠黃帝遂至廣寧泰常七  
年九月幸溫南遂如廣寧幸橋山遣使者祠  
黃帝因東幸幽州太武帝神麇元年八月東  
幸廣寧臨觀溫泉以太牢祭黃帝此媯州之  
橋山也郭景純注山經云帝王冢墓皆有定  
處而山經往往復見蓋聖人久于其位仁化  
廣及至于殂亡四海無思不哀故絕域殊俗

之人聞天子崩各自立位而祭起土為冢是以所在有焉景純之論可謂善言古者矣後之讀史偏執成見以史紀為是必以魏書為非然在黃帝既都涿鹿安在冀州之不可營墓乎 柯維騏曰按諸史所載謂黃帝採銅鑄鼎成帝崩夫謂鼎成騎龍升天蓋本方士之說太史紀之封禪書以見漢武之惑此云崩且墓所以祛后世之疑也 日下舊聞曰按史記黃帝崩葬橋山魏王象繆襲等撰皇覽云在上郡地理志謂是上郡同陽縣括

地志謂在寧州羅川縣東八十里子午山今平谷之陵人多疑流傳之說然帝既都涿鹿則葬于此理亦有之抑衣冠之葬或者非一處也

吳廷華曰黃帝紀云神農氏世衰諸侯相侵伐暴虐百姓而神農氏不能征于是軒轅乃習用干戈以征不享諸侯咸來賓從而蚩尤最為暴莫能伐又曰炎帝欲侵陵諸侯諸侯咸歸軒轅教熊羆貔貅驅虎以與炎帝戰于阪泉之野三戰然後得其志所謂神農氏者

據司馬貞索隱謂神農氏子孫即班固所云  
參盧皇甫謐所云帝榆罔則所稱炎帝嘗即  
前所謂神農氏益襲神農之號者然據帝王  
代紀及古史攷俱云神農生帝哀哀生帝克  
克生帝榆罔凡八代五百三十年而軒轅氏  
興則榆罔特神農之曾孫若以此紀神農氏  
為榆罔則神農氏止三代而軒轅興非八代  
矣謚自為矛盾乃如此人據舜紀自黃帝至  
舜禹皆同姓而異其國號故黃帝為有熊帝  
顓頊為高陽云云則所謂襲號者不過襲其

國號非并黃帝顓頊等名而襲之也神農雖  
莫可攷然以黃帝為有熊之例例之則既襲  
神農之號不應又以炎帝為國號而襲之如  
并襲之則八炎帝矣易所謂教耒耨者何人  
紀所謂與黃帝戰者又何人也況代紀等書  
謂炎帝姓姜其母則曰女登其所娶奔水之  
女則曰聽該其後人則曰帝哀帝克帝榆罔  
俱若有據至帝則惟曰炎帝神農而其名不  
傳則非名炎帝即名神農後人烏得并其名  
而襲之况據左氏烈山氏之子曰柱其于帝

克是一是二又不可解也又據國語炎帝黃  
帝皆少典之子其母皆有嫫氏之女則黃之  
繼炎不過兄終弟及之常熟皇之說不足據  
此紀亦非信之矣今即紀說論之由前之說  
則諸侯暴而王室衰由後之說則王室虐而  
諸侯叛是同一炎帝神農而忽盛忽衰同一  
黃帝而衰則攝政虐則三戰何矛盾耶又湯  
之伐夏也不過曰格爾衆庶武之伐殷也不  
過曰虎賁三千黃帝為五帝之首乃遽為伐  
君之倡且教熊羆貔貅龜虎而戰之一戰不

已至于再再戰不已至于三曰三戰然後得其志則其志尚可問哉且既云邑于涿鹿之阿則定都矣又云遷徙無常處以師兵為營衛則似黃帝戰炎帝伐蚩尤逐葷粥外日事征伐終身在師兵營衛中并涿鹿之都亦不可謂之常處者豈不悖耶昔人謂史遷鑿屋室之禍于武帝紀事多忌諱不傳是也自余論之則黃帝一紀寫來俱是武帝小樣爾武帝大畧不過窮兵黷祀求仙即黷祀中事橫歛即由窮兵黷祀而來故大略不遇此二者



紀曰披山通道未嘗寧居東至于海登凡山  
及岱宗西至于空同登鷄頭南至于江登熊  
相北逐葷粥合符釜山又曰萬國和而鬼神  
山川封禪與為多焉獲寶鼎其梗槩若俱為  
武帝寫照蓋此紀為百三十篇之首故立意  
頌君紀黃帝正諛孝武爾讀此紀者當自知  
之

帝顛頊高陽者

路史後紀曰姬姓古史攷以為妊姓纂則謂  
顛帝帝風姓

黃帝之孫而昌意之子也

路史後紀曰黃帝氏之曾孫祖曰昌意取蜀山氏曰景嫫生帝乾荒取蜀山氏田樞是為河女所謂淖子也淖子感瑤光於幽防而生

顓頊

北至于幽陵幽州義曰

愚按說本王逸楚詞章句

顓頊崩

集解皇甫攢曰在位七十八年

水經注曰淇水北逕白祠山東歷廣陽里逕顓頊冢西俗謂之殷王陵非也帝王世紀曰

顓頊葬東郡頓丘城南廣陽里大冢者是也

路史後紀曰在位七十有六崩韓愈云年

七十九世紀云九十八二十一而立或云三

十六立皆非按新序云齊閭丘印遮宣王曰

昔帝顓頊十二而治天下故禮傳謂顓頊帝十

二而冠蓋因立而始加元服也 又曰郡國

志云顓頊葬俗名青冢山崔鴻前趙錄云和

苞諫劉曜曰堯葬穀林市不改肆顓頊帝葬廣

陽下不及泉十道志云鮒鰓即廣陽山之別

名也寰宇記在頓丘西北三十通其記帝陵

在相州臨河乾德四年置先代帝王守陵戶  
高陽在臨河寰宇記臨河東九里顓頊廟而  
九域志順安高陽縣有顓頊陵縣故隸瀛而  
臨河濮陽與相出入也然顏真卿吳地記烏  
程有顓頊陵則非矣務顓九域志與作鮒鮒  
同

帝嘗高卒者

正義曰帝王紀云嘗母無聞焉

路史後紀曰姬姓古史考云或云房姓妄也  
一云妘姓父僑極取陣豐氏曰東高堂陸北  
壞履是也履大跡而傷生譽

娶姬訾氏女生摯

路史國名紀曰姓書訾陬三皇時諸侯

帝嚳崩

山海經狄山帝嚳墓于陰 帝王世紀帝嚳

葬東郡頓丘廣陽里 水經注淇水逕雍榆

城東北帝嚳冢西世謂之頓丘臺非也皇覽

曰帝嚳冢在東郡濮陽頓丘城南臺陰野中

者也 路史後紀曰帝生三十而御天六十

有三載崩葬頓丘臺城陰野之秋山山在魏

之頓丘元和志頓丘西北三十五有秋山縣

北三十有帝，佶墓寰宇記秋山冢見存。皇覽云在頓丘城南。唐以仲春祀帝，佶於頓丘三年一享。山經九域志皆作狄云。山陰今陵見存。

帝堯者

集解謚法曰翼善傳聖曰堯索隱曰堯謚也

路史發揮曰：學者疑謂放勳重華文命昔之人，或以為名而堯及舜禹在昔俱以為謚。鮮有以為名者，曰否皆名也。謚不出于古書傳。雖云謚出黃帝，然實出於周公。何以言之？予觀夏商帝王皆非謚法知之也。死謚周道也。

古者生無爵死無謚故始皇之制曰朕聞太古有號無謚中古有號死而以行為謚是以秦秀謂昔周公弔二季之陵遲哀大道之不行于是作謚以紀其終非古有之而穀梁子亦曰武王崩周公制謚法大行受大名小行受小名所以懲惡而觀善也世有謚法輒惡文致堯舜禹湯桀紂之類而彝入之蓋始於白虎群儒斯最荒唐者也夫堯舜禹之為名固自章也堯曰咨汝舜舜曰咨汝禹汝棄汝契是果名也若以為謚則棄契垂益夔龍一

皆為謚而後可有。鯀在下曰虞舜是豈鯀而  
在下已有謚乎。彼則又曰此後世之追志斯  
亦罔矣。夫書之於名分法最嚴密。世莫稽也。  
方舜未嗣。每書以舜。蓋未始一稱帝。逮其既  
立。則惟書帝而弗復書以舜。此則上古記史  
之法如是。抑豈先謚而後帝乎。昔魏周訢謂  
魏君曰。吾所賢者堯舜堯而舜名是古未嘗  
以為謚也。然則其說謬于漢儒可知矣。

曰昧谷

徐廣曰

一作柳

谷駟接

孔安國曰

昧谷

曰

昧

谷

學齋佔畢曰尚書堯典分命和仲宅西曰昧



谷正經注疏云日所入處名曰昧冥之谷史記注引孔安國云日入于谷而天下冥故曰昧谷以為羲仲宅暘谷之對其義坦然明白矣而周禮縫人衣翬柳之材注柳之言聚也諸飾之所聚且引書曰分命和仲度西曰柳穀注疏遂云柳者諸色所聚日將沒其色赤兼有餘色故曰柳穀其云書曰者是濟南伏生書柳文見今尚書云宅西日時谷此周禮注及疏之說也然余攷漢隸占定古文尚書上云分翬味中窀屬曰睨谷睨乃占昧字初

無柳谷之文及旁攷史記堯本紀中命和仲居西土曰昧谷徐廣注曰一作柳谷亦日入處地名太史公帝紀務變易二典正文先儒固已評之徐廣因而以柳谷地名注之亦已淺陋至周禮之注又變為柳穀則并谷字而易其文周官至劉歆時方奏立博士胡康侯父子已枚數其失而唐人正義又鑿說以諸色而易諸飾以證柳谷之義其視漢儒義益遠矣至若改谷為穀又無其義

試不可用而已

史記曰洞本無用字

朕在位七十載汝能庸命踐朕位正義曰孔安

云堯年十六載時八十六為天子在位也

徐孚遠曰據皇甫謐所記堯崩年百十八歲在位九十八年則是二十方即位也與此不

同

堯又曰誰可者

辨惑曰尚書堯典帝曰疇咨若時登庸放齊曰胤子朱啟明帝曰疇咨若予采驩兪曰共工方鳩僝功帝所謂若時若子采者其義雖

不甚明要之是兩事而本紀于後節但云堯  
又曰誰可者却只是申前事也

三苗在江淮荊州

陳子龍曰三苗在洞庭之南與淮無與豈或  
時時流軼及東境耶 史詮曰淮當作滙謂  
江之巨浸也

放驩兜於崇山

路史國名紀曰以嬖臣孤攻專權亡國云荀卿  
之云堯今弘農有地名臯志為驩兜之都然意驩  
為國當如魯謹未必臯地其後竄之崇山則

今澧之慈利也有驩臯墓然領外驩州圖經  
記以為其窟所樂史亦記驩州為所放處則  
去崇山遠矣驩隨為州是為驩朱國山海經  
云國人似仙人而鳥喙捕魚海島郭氏謂堯  
臣有罪放南海死帝矜之使其子居南海祠  
之而神異經言驩臯民鳥足扶翼而行食魚  
不畏風雨有所觸死乃已居南荒中尤異

遷三苗於三危

路史國名紀曰今戎虜瓜沙等州是其處有  
三峰山俗曰升兩山在燁皇南三十里地道

記云鳥窠同穴西有三危山三苗所處是也

陳子龍曰三惡皆一人可遷三苗則舉國

西徙矣亦猶漢武之遷歐越周之遷頑民也

凡二十八年而崩

山海經狄山帝堯葬于陽

今陽城縣西東阿

縣相亭南皆有堯冢

墨子堯北教乎八狄道

堯死

之陰衣衾三領穀木之棺葛以紕之既泥而後哭滿塹無封已塋而牛馬乘之水經注

地理志曰成陽有堯冢靈臺今成陽城西二

里有堯陵陵南一里有堯母慶都陵於城為

西南稱曰靈都鄉號崇仁邑號脩義皆立廟  
四周列水潭而不流水澤通泉泉不耗竭至  
豐魚笋不敢採捕前並列數碑栝栢數株檀  
馬成林二陵南北列馳道逕通皆以磚砌之  
尚脩整堯陵東城西五十餘步中山夫人祠  
堯妃也石壁塔墀仍舊南西北三面長櫺連  
蔭扶疎里餘漢建寧四年五月成陽令管遵  
所立碑文云堯陵在城南九里中山夫人初  
在城南二里東南六里堯母慶都冢秀地驗  
狀成為踈僻蓋聞疑書疑耳

趙明誠金石

錄成陽屬今雷澤歐陽集古錄謂史記地志  
及水經諸書皆無堯母葬處案班固西漢劉  
昭東漢書地理志皆曰成陽有堯冢靈臺而  
東漢志章帝元和二年東巡狩將至大山道  
使使者奉一太牢祠帝堯於濟陰成陽靈臺  
與帝紀所載正同帝紀章懷太子註引郭  
綠生述征記云成陽縣東南有堯母慶都墓  
上有祠廟俗亦名靈臺文冊水經注今成陽  
城西二里有堯陵陵南二里有堯母陵於城  
為西南稱為靈臺蓋兩漢所載似以靈臺為



堯冢惟此碑與述征記水經迺直指為堯母  
冢爾然水經云在成陽西南而述征云在東  
南未知孰是 洪适隸釋兩漢地志濟陰成  
陽有堯冢靈臺不明言靈臺為堯母冢也章  
帝紀元和二年使使者祠唐堯於成陽靈臺  
注引郭緣生述征記曰成陽有堯陵南一里  
有堯母慶都陵稱曰靈臺據此與碑合靈臺  
非堯冢明矣 路史發揮曰堯之冢在濟陰  
成陽堯母靈臺在南漢章帝元和二年使奉  
太牢祠堯於成陽靈臺是其處也今皆在濮

之雷澤東南元和郡縣志堯母廟縣東南四  
嘉三年二千七百二十一年紀載於而王充  
碑貞觀十一年禁樵採春秋奠酌  
乃云堊崇山墨子則謂北教八狄道死南已  
之市而堊蛩山之陰蓋儀墓爾論衡曰堊堊  
崇山像墓如漢世遠郡國陵與蒼梧舜墓之  
類非實堊所山海經云堊葬狄山之陽郡善  
長以爲非按歐陽文忠公集古錄言靈臺碑  
亦政類以為史記地志水經諸書皆無堊母堊處粵  
稽地志及范曄志則云成陽有堊冢靈臺而  
此碑云堊母奠茲欲人莫知名曰靈臺又郭  
緣之述征記成陽城東南九里有堊陵陵東有

中山夫人祠在城南二里蓋堯妃也東南六  
里有慶都冢上有祠廟而水經注言成陽城  
西二里有堯陵陵南一里有慶都陵於城為  
西南稱曰靈臺鄉曰崇仁邑號脩義其塋處  
明白若此惡得云無言耶然述征記在成陽  
東而今之所識乃在成陽西北四十里穀林  
則古今壇場相出入有不同者郭氏所記乃  
小成陽小成陽在成陽西北五十里隸於河  
南有山曰成陽穀林在其下高誘注呂春秋  
是穀林小成陽以山得名乃堯塋所在有堯之

故名焉即庸俗所謂因堯城者

吳廷華曰此紀具以今文尚書之說填竇成文如所錄虞書親九族以下墳虞以上不過易平章曰便章協和曰合和欽若曰敬順歷象曰數法隅夷曰郁夷寅賓曰敬道平秩曰便程厥民曰其民寅饒納日曰敬道日八宵中曰夜中以殷中秋曰以正中秋平在朔易曰便在伏物允釐百工曰信飭百官庶績咸熙曰衆功皆興疇咨若予采曰誰可者方鳩倂功曰旁聚布功靜言庸違象恭滔天曰共

工善言其用僻似恭漫天俾乂曰使治明明  
揚側陋曰悉舉貴戚及疏遠隱匿在下曰在  
民間瞽子曰盲者子釐降曰飭下嬪于虞曰  
如婦禮而已其辭皆依經直叙所易字如方  
音又如訓詁不見史才慎和五典以下亦然  
至易舜讓于德弗嗣句為舜讓于德不擇似  
舜又以讓為悔者受終文祖下增帝堯老命  
舜攝行天子之政以觀天命二語又似受終  
後堯意尚未決者則謬矣此外所增惟其仁  
如天九語不失帝德之本然至云堯避位二

十八年而崩此即明堂位周公踐阼之意不可為訓竹書云昔堯德衰舜囚堯復偃蹇丹朱使不與父相見正義謂括地志濮州有故堯城又有偃朱故城即其所以誣聖人者至莽操之不若皆此等紀啓之末又云授舜則天下得其利而丹朱病授丹朱則天下病而丹朱得其利堯曰終不以天下之病而利一人而卒授舜以天下似堯之禪位其輾轉于利害之間籌之至熟而後授舜者將聖人公天下之心盡數抹殺豈不妄誕按此所載增

于虞書者不過此數語而可議已如此班孟  
堅謂史記是非謬於聖人蓋非虛爾

虞舜者

路史後紀曰王符志氏姓云舜姓虞而史伯  
亦稱虞幕則其上世為虞矣杜預云虞乃舜  
之先世數未聞

名曰重華

路史後紀曰世紀云目矐子名重華真源曰  
字仲華

重華父曰瞽叟

愚按正義引孔安國云瞽舜父有目不能分別善惡故時人謂之瞽配字曰叟堯紀云盲者子此紀下云瞽叟盲而舜母死則孔說不足據也 尚書疏云經說舜德行美其能養惡人父自名聵何須言之若實無目即是身有固疾非善惡之事輒言舜是盲人之子意欲何所見乎論語曰未見顏色而言謂之瞽則言瞽者非謂無目

瞽叟父曰橋牛橋牛父曰句望句望父曰敬康敬康父曰窮蟬窮蟬父曰帝顓頊顓頊父曰昌



意以至舜七世矣自從窮蟬以至帝舜皆微爲庶人

路史餘論曰呂梁碑劉耽作碑中叙紀虞帝之世云舜祖幕幕生窮蟬窮蟬生敬康敬康生喬牛喬牛生瞽叟瞽叟產舜命禹行水道呂梁特此節完備爲可攷質之於傳惟無句望且不言出自黃帝諒得其正 邵泰衢曰昌意者黃帝之子皇英乃軒轅五世之女舜乃軒轅八世之孫堯舜人倫之宗以孫娶祖瀆禮亂常又何觀厥刑善其婦禮爲哉窮蟬

既爲帝子又何以微爲庶人一也男女辨姓  
婚姻不通舜爲堯之五世從孫而可以尚曾  
祖姑哉二也帝王之姓累世不易唯舜之姓  
非先王之姓三也舜爲堯之從孫禹爲舜之  
從祖仍一家而祖孫授受也謂之揖讓謂之  
公天下可乎蓋堯以至公授異姓在下之鯀  
故曰傳賢舜以天下傳外姓有功之賢故曰  
翼位夏本紀曰鯀父顓頊又云自黃帝至舜  
禹皆同姓而異國號之皆非矣四也若言鯀  
弟輝兄本之顓頊一體夫何鯀則始生禹子

蟬遂遠歷五傳且舜年長禹二十揆諸年世甚為懸絕况舜冀地非昌意降居若水之方必非項後史辨之矣至堯用元愷不以為舉舜以非親故謂之舉五也舜苟堯親非側微矣惟其側微而必本岳薦然後舉之歷試之而朝野信之然後授之六也至受終文祖者受天下于人必告其所從受者文祖者堯之太祖也祖堯之祖以明受之堯也非祖考本生之祖也禹之受命于文宗曰堯廟又推舜所自受之堯也顓頊豈虞氏之祖哉

舜耕歷山

路史餘論曰歷山今河東之雷首山也其山九名一曰首陽臨河與大華對峙即謂歷觀揚雄所云登歷觀以遐望者樂史謂在偃師西北二十五里有舜廟舜井媯水汭水媯南汭北然後魏輿地圖上谷記下洛城西南四十有潘城城西北三里亦有歷山形如覆釜下有舜替二祠云是舜居帝之蹤迹何聞至是而齊之歷城南五里又有歷山水經注云上有舜祠縣東復有舜井亦云耕處寰宇記

在縣東百步云舜之所穿又有華水與歷山  
井通曾子固言舜耕歷山漁雷澤陶河濱作  
什器於壽丘就時於負夏康成謂歷山在河  
東雷澤在濟陰而負夏則衛地皇甫謐乃謂  
壽丘在魯東門之北河濱為即陶丘乃定陶  
西南之陶丘亭耕稼陶漁皆舜之初年其地  
必不大相遠今皆在魯衛間則歷山不得獨  
在河東遂以為娶後所居後世因有媯水而  
遷就之夫河中乃帝所生若所都而歷城古  
歷下也其相去也遠矣耕漁之時徒以瞽叟

不順暫即荒野願非日後就敗之比其初未  
必遠去父母之側河濱雷澤其說未悉按九  
域志濟南濮陽河中皆有歷山俱存祠廟而  
今秦地池陽澧陽始寧河縣上虞無錫亦皆  
有之蘓氏演義云歷山有四一河中二齊之  
歷陽縣三冀州四濮之雷澤雷澤不聞有二  
耕漁必不相遠即此為是今曹濮間有舜豢  
龍井定陶城皆其蹤也然歷山何止四哉信  
都之歷山樂史亦以為舜耕在是援神契云  
舜生姚墟應邵謂與雷澤相近寰宇記在雷

澤縣東十三里歷山在縣西北十六今漢之

雷澤西北六十有小山孤立謂之歷山山北

有小阜屬地目之姚墟邠謚緣之皆記舜耕

之所而池之建德東十里更有堯城山縣南

三十有堯城堯祠云堯巡所至梁武於此立

太原府縣北二十為舜城城有舜井有樞山

上有堯舜二祠元和郡志謂是西帝南巡所

至樞山隅井曰舜井秋浦志歷山在東流縣

所至東本屬新門新安志在祈門西八十里

寰宇記石塘西百六十有樞山高五里上有

澄水大抵古迹堯舜廟說亦以爲放魚乃唐之

里龍山亦有堯舜廟說亦以爲放魚乃唐之

也神堯而周處記始寧界復有舜所耕田一山  
多柞曰謂樞山而以其區為之雷澤以其中  
有大小雷山也王介甫從之妄矣且以姚媽  
之名在在而是金之西城故有姚方媯墟杜  
佑謂舜生此而世本亦謂媯墟舜所都在西  
城今長沙縣有為水云舜所都而上虞之損  
石號為公嶽會稽又有媯水三撫之泉經之  
東入海圖經亦以為滄降之地祝阿故縣又  
有灤水俗呼娥姜水原有娥英之廟水原山  
上有帝舜祠下開大穴為之舜井究之泗源



又有陶墟亦有舜井其西阜號媯亭山下之一漏澤方十五里指為帝之所漁不知此自挑墟謝息之所遷者又水經注上虞一曰虞賓太康地記為避丹朱之所而雷澤亦非一周處謂是太湖故寰宇引尚書釋言謂在震澤若陽城漢獲澤縣墨子則言舜漁在此澤今在陽城西北十二寰宇記為烏虢切矣郡國志言邑西今有地名舜田然今潭之益陽岳之沅江故梁之重華縣有虞帝城記亦謂是所都而述異記去湘水岸三十有相思宮

望帝臺志為二妃之迹冷道臨武桂陽藍山  
等處悉有帝舜之祠藍山更有舜水舜鄉縣  
西十五與永明西十五皆有娥皇女英之廟  
江華太平鄉有舜女寺即按歷城東南十里  
之廟山晏氏三齊記在縣東南後人思舜而  
置廟也湘中記云地有舜之遺風人民純朴  
故老猶彈五弦之琴為漁父辭莫不以為虞  
帝之居豈盡信邪

漁雷澤

路史後紀曰淮南子云釣于河濱獲澤在今

澤之陽城唐護澤縣應邵云澤在縣西北沁水東逕護縣故城南漢之澤氏縣魏土地記陽河有沁與護澤水合者紀在梁惠王十九年晉取玄武護澤墨子亦言舜漁在此故金鑰謂澤州為舜澤十道記云澤州以護澤得名皆在河東或云漁于雷澤雷澤濟陰非也

### 陶河濱

路史後紀曰河濱在蒲州陶城北有故陶城南去歷山甚近故孟津有陶河之稱一云河濱在濟之鄆城蓋以東夷之說也夫帝冀人

而虞濱歷山陶城皆在冀蓋初耕于野未必  
遠去父母也然壽丘在濟負夏在衛則商販  
觀風或往來於此不必限一所

作什器於壽丘就時於負夏

路史後紀曰灰於常羊什器於壽丘就時負  
夏未嘗暫息頓丘買貴於是販於頓丘傳虛  
賣賤於是債于傳虛以均救之故孔子曰耕  
漁陶販非舜事也而往為之以救敗也

舜父瞽叟頑母嚚弟象傲皆欲殺舜舜順適不  
失子道兄弟孝慈欲殺不可得即求嘗在側

辨惑曰舜本紀云瞽叟更娶妻而生象象傲  
瞽叟愛後妻子常欲殺舜舜逃避及有小過  
則受罪順事父及後母與弟日以謹篤匪有  
懈後又云舜父瞽叟頑至即求常在側字語  
重複而兄弟孝慈一句亦不成義理

### 舜居媯汭

路史餘論曰媯一作馮馮汭舜廟後周宇文  
護造地記云二泉在首山北山中皆逕山下  
而入何然孔安國馬融王肅杜預皇甫謐皆  
以為汭為媯水之曲云

堯二女不敢以貴驕事舜親戚甚有婦道

列女傳云元始二妃帝堯之女瞽叟和寧卒享福祐 邵泰嚮曰岳曰父頑母嚚象傲克諧以孝烝烝乂不格姦帝曰我其試哉釐降二女于漵嬪于虞夫以諧孝烝乂乃始釐降嬪虞不過二女與處試其刑于式化耳若使瞽叟復欲殺之又何克諧不格姦之有余以讓畔讓居宜在釐降之先若已女妻男處而瞽不奸大似諂尊奉勢之流歸之德化詞屬未安而萬章有二嫂治棧之文又似殺舜

在釐降後然塗廩之時兩筮從何而辨穿井  
之時日實從何匿空似皆未喻者也

後繫叟又使舜穿井舜穿井為匿空旁出

史通曰夫杳冥不測變化無恒兵革所不能  
傷網羅所不能制若左慈易質為羊劉根竄  
形入壁是也時無可移禍有必丘雖大聖所不  
能免若姬伯拘於羑里孔父阨於陳蔡是也  
然俗之愚者皆謂被幻化是為聖人豈知聖  
人智周萬物才兼百行若斯而已與夫方內  
之士有何異哉如史記云重華入於井中匿

空出去此則其意以舜是左慈劉根之類非  
姬伯孔父之徒苟識事如斯難以語夫聖道  
矣且案太史公黃帝堯舜軼事時時見於他  
說余擇其言尤雅者著為本紀書首若如向  
之所述豈可謂雅邪

乃流四凶族遷于四裔以御魑魅

辨惑曰舜典稱四罪而天下咸服言刑之當  
而已史紀帝堯本紀云舜言于帝請流共工  
于幽陵以變北狄放驩兜於崇山以變南蠻  
遷三苗於三危以變西戎殛鯀于羽山以變



東夷至舜紀則引左傳所載渾沌窮竒構杭  
饗養之事云流凶族遷於四裔以禦魑魅文  
雖差殊其為四罪一也一則曰變四夷一則  
曰禦魑魅舜之意果安在哉蓋二者皆陋說  
不足取焉且此事止當作舜紀而復見於堯  
止當從經而反取於傳紀之語不亦冗而雜  
乎 吳廷鞏曰紀既載虞書流共工放驩兜  
遷三苗殛鯀事又自為之說以渾沌窮竒構  
杭饗養為四凶舜流之是唐虞有兩四凶也正  
義謂渾沌即驩兜服虔謂窮竒即共工賈逵

謂構杙即絲正義謂鑿斧即三苗此特為司  
馬作彌縫耳按虞書驩堯堯臣即為共工於  
帝者紀稱渾沌掩義隱賊好行凶惡帝臣雖  
不善未必至於此極又紀稱構杙不可教訓  
不知話言若絲則四岳薦之帝堯試之九載崇  
伯績在太原謂不可教訓不知話言者能如  
是乎紀稱少皞氏有不才子毀信惡忠崇飾  
惡言天下謂之窮奇服虔以為共工者蓋與  
虞書象恭之說相似耳然據左氏傳共工氏  
有子曰句龍杜氏謂共工在太皞後神農前

若少皞因黃帝之後則共工非少皞之裔不  
得即以為窮竒也虞書言有苗昏迷不恭侮  
慢自賢與紀言饕餮貪食冒賄不符豈得合  
而一之又虞書言堯任賢勿貳去邪勿疑雖  
孔壁古文不足信然觀今文虞書放齊薦朱  
而帝以畀訟却之四岳薦鯀而帝以圮族却  
之至明揚等語皆所謂勿疑勿貳者此紀則  
謂元凱十六族世濟其美堯未能舉又云三  
凶堯不能去是所謂見善不能舉見不善不  
能退者何以為堯

五流有度

史詮曰古本度作庀尚書作宅蓋庀之訛也

夏紀三危既度同

於是垂為共工

集解馬融曰為司  
共理百工之事

徐孚遠曰是時禹為司空宅百揆垂何得亦  
為司空抑禹自宅揆解司空之職以授垂即  
將共工別為一官與司空分職而馬說誤矣

皆曰益可

史詮曰古本益作彝

嗟女二十有二人

路史後紀曰王蕪等以四岳九官十二牧為之然四岳非一人也故胡益之以百揆易四岳不知百揆在九官中矣若合四岳則二十五矣故世紀云二十五人或九官或在十二牧中一人兼兩職者若先為牧又兼四岳九官爾孔氏以為禹益垂伯夷夔龍六人新命有職及四岳十二牧然其戒四岳以闢四門戒十二牧以民食蠻夷是岳牧之事已各戒之則此咨二十二人必不兼矣况亮天工者非岳牧之任而禹稷契皋陶有不應絀者

元凱十六相與羲和之六卿歟九官在其中  
故各以事咨戒之又如羣臣受任而遜于人  
亦皆授職如多戕伯與朱虎熊羆不見任用  
有舊職不移也

踐帝位三十九年南巡狩崩

帝王世紀曰舜以堯之二十一年甲子生三  
十二年甲午徵用七十九年壬午即真百歲  
癸卯崩或云舜年一百五歲亦云一百一十  
三歲尚書疏曰舜年六十二為天子大禹  
謨朕宅帝位三十有三載乃求禪禹孟子曰

舜薦禹於天十七年是在位五十年明矣史  
記皆謬周洪謨曰按舜年九十三自謂倦  
于勤而命禹居攝豈有百有九歲之後其哀  
已甚而又南涉大江深入蠻夷之地哉為此  
說者惑于書陟方乃死之文耳今按韓子謂  
竹書紀年紀帝王之歿曰陟師古云古謂掘  
土為坑曰方是時舜年已老故垂歿之際先  
定其壙而後乃死然其定壙蓋亦不過謂吾死  
之後可塋某處非若後世擇選風水預為壽  
藏者也要之舜都蒲坂距鳴條二百餘里孟

子云卒于鳴條者得之 吳廷華曰紀云舜  
年三十堯舉之年五十攝行天子事年五十  
八堯崩年六十一踐帝位三十九年崩于蒼  
梧之野據此則堯紀避位之說妄矣然又據  
虞書帝曰詢事考言乃言底可績三載汝陟  
帝位又云舜生三十徵庸三十在位五十載  
陟方乃死又舜曰耄期倦于勤汝惟不怠總  
朕師孟子云舜相堯二十有八載又曰堯老  
而舜攝又曰禹祖舜十有七年合諸說論之  
則受終當在徵庸後之三年即攝政時也越



二十八年而堯崩蓋兼試舜之三年言則堯崩時舜固五十有八至三年喪畢乃踐帝位則六十一矣虞書三十在位本大槩言之耳若所謂五十載陟方乃死則舜在位之實數也况舜薦禹時曰堯期則舜時已九十餘歲又十七年而禹嗣位則與虞書五十載之說合堯紀亦有二十八載語此紀後亦有十七年之說此獨言五十攝政踐位三十九年不但與經傳不符與紀說亦自相背戾不足據也

崩於蒼梧之野葬於江南九疑是為零陵

山海經蒼梧之山帝舜葬于陽帝丹朱葬于

陰即九疑也又曰赤水之東有蒼梧之野舜

與叔均之所葬也又曰南方蒼梧之丘蒼

梧之淵其中有九嶷山舜之所葬在長沙零

陵界中墨子舜西教乎七戎道死葬南紀

之市衣衾三領穀木之棺葛以緘之已而市

人乘之呂氏春秋舜葬于紀市不變其肆

九疑山下元和即縣志九疑山在永明縣

東南一百里舜所葬也九山相似行者疑惑

故為名二妃冢在華容縣北一百六十三里  
青草湖上 元結九疑山圖記曰九疑山方  
二千餘里四州各近一隅世稱九峯相似望  
而疑之謂之九疑亦云舜望九峯疑禹而悲  
從臣九作九悲之歌曰謂之疑九峯殊極高  
大遠望皆可見也 方輿勝覽檀弓云舜葬  
於蒼梧之野習鑿齒云虞舜葬零陵元和郡  
縣志亦云九疑舜之葬也案太史公曰舜南  
狩行死於蒼梧之野歸葬於江南之九疑小  
海經云舜之所葬在今道州零陵縣界蒼梧

九疑當是兩處後人誤引舜死之地以為舜  
葬之所耳元混一方輿勝覽舜陵在女英  
峰下路史發揮曰諸馮負夏鳴條皆在河  
南北故葬于紀所謂紀市也今帝墓在安邑  
而安邑有鳴條陌其去紀才兩舍帝紀言河  
中又舜冢信矣夫蒼梧自非五服人風嫫  
地氣高瘴在虞夏乃無人之境豈巡狩之所  
至耶方堯老舜攝也於是乎有巡狩之事今  
舜既已薨期勅劇形神告勞釋負而附禹則  
巡狩之事禹為之矣豈復躬巡狩於要荒之

外也哉是以劉知幾之徒得以撫厲王流

楚帝遷柳及夏桀趙嘉之事而疑舜禹之明

德泌嘗攷之象封有鼻故墓在於始興義均

封於商故女英之冢在商鄒親謝禹其餘支

庶或封巴陵或食上虞采西城邑也陽與夫

懷戎衛山長沙無錫故其墓或在江華或在

巴陵上虞禹為天下帝之諸子分適他國其

之巴陵者登北氏蓋從之故其墓在於巴陵

黃陵也登北氏帝之三妃不得皆後於帝死

帝之第三妃育既莖於陳倉則其先死矣隋陳倉有黃帝孫

黃帝孫

舜妻既皇英各自有墓則黃陵為登北之墓  
審矣唯登北氏從徒巴陵則其二女理應在  
焉故得為相之神而其光焯於百里是皆可  
得而攷者胡自氤氳而爭為堯之二女乎是  
則九疑之陵或弟象之國所封崇爾不然商  
均寔也大荒南經云赤水之東蒼梧之野舜  
子叔均之所葬也而九疑山記亦謂商均寔  
其陰豈非商均徙此因葬之後世遂以為虞  
帝之墳邪是以蔡雖九疑碑辭乃云解體而  
升而胡曾九疑碑圖且謂今無復墓然則蒼

梧之藏有其語而已矣 邵泰衛曰禹受命  
于神宗之日舜年九十五矣耄期倦于勤今  
乃百有十歲猶自躬巡荒服乎舜典云舜生  
三十徵庸三十在位五十載陟方乃死史官  
紀舜典之總結從生至死也姚舜牧氏曰升  
遐死之別名也若以陟方為升遐又云乃死  
史何其複也史紀舜生始末曰舜三十徵庸  
則前之祇載克諧也及受終三十載允陟五  
十載為天地立心為生民立命為萬世開太  
平而不敢自暇豫也至于若時五十載而巡

歷于方岳之下也如此乃死焉自生至死乃  
字始明何得云巡狩而死于蒼梧之野乎  
封第象為諸侯

路史發揮曰幽明錄云始興有鼻天子冢鼻  
天子城即南康語南康縣鼻天子城者亦見  
虞賓錄蓋地後貫南康昔人不明為何人乃  
象冢也

舜子商均亦不肖

路史後紀曰女嬃生義鈞及季釐季釐封緡  
為桀所克義鈞封於商是為商均是喜歌舞



擇其言尤雅者故著為本紀書首

吳廷華曰據史遷云擇其猶雅者著為本紀似矣夫雅者正也此紀所述不正如此何以謂之雅况尤雅耶又其言曰孔子所傳宰予問五帝德及帝繫姓儒者或不傳蓋當時以大戴禮及家語非聖人之言故不傳學是漢儒之去取固不爽也又其言曰余嘗西至空桐北過涿鹿東漸于海南浮江淮長老各徃徃稱黃帝堯舜之處風教周殊總之不離古文者近是指家語及大戴禮是儒者不傳而遷則探

方上俗說以証家語等而信之其取之之義已與儒者不同矣又其言曰予觀春秋國語其發明五帝德帝繫姓章矣顧第弗深考夫春秋國語正儒者所傳乃以為弗深攷其去之之義又與儒者不同矣又曰其所表見者皆不虛書缺有間矣其執乃時時見于他說如謂表見不虛即不離古文之意蓋指家語等言之索隱謂承春秋國語則與上第弗深考不合且既取家語又取春秋則夾雜非語竟索隱蓋為之彌縫耳不足信要之此文大

意曰俗說而取家語大戴又目書缺而別求  
之他說他說者讖緯之類若春秋國語則其  
所謂第滯深考者去取之謬如此猶曰擇之  
是真昌黎所謂擇焉不精者矣